

# **Articles From The Year 2024**

**Datuk Dr. Anis Yusal Yusoff**

Executive Director  
International Institute of Public Policy and Management  
University of Malaya

# Table of Contents

<b>1. General</b>	<b>2</b>
1.1. Pemimpin komuniti berintegriti	3
1.2. Menoktahkan kemiskinan di Malaysia	5
1.3. Masjid tempat pelbagai fungsi	7
1.4. Teknologi perlu nilai-nilai murni	9
1.5. Akal budi Melayu semakin dilupakan	11
1.6. Kebun peribadi sara diri	13
1.7. Cara hidup orang yang tahu adab	15
1.8. Bina kepercayaan rakyat	17
1.9. Pentingnya pendidikan muzik	19
1.10. Tanggungjawab kepada diri sendiri	21
1.11. Ada apa di Rusia?	23
1.12. Bersedia depanti cabaran negara tua	25
1.13. Tangani kesesakan lalu lintas	27
1.14. Ujian perubahan kelakuan pelajar	29
1.15. Cabaran Pendidikan 2024	31
1.16. Apa makna Pilpres bagi Malaysia	33
1.17. Polis dan Kepercayaan masyarakat	35
1.18. Laluan Malaysia menuju masa depan	38
1.19. Harapan Tahun Baharu	40

## **1. General**

## 1.1. Pemimpin komuniti berintegriti

*Sinar Harian. 2024 Oct 24*

PEMIMPIN berprinsip dan berintegriti memainkan peranan penting dalam membangunkan sesebuah komuniti.

Perkara ini menjadi lebih penting khususnya di negeri-negeri yang mempunyai kepelbagaian etnik dan geografi yang meluas.

Menjadi lebih penting lagi apabila kita membicarakan mengenai keperluan untuk melatih dan menyediakan pemimpin-pemimpin dalam kalangan pemimpin masyarakat dan pemimpin pertubuhan masyarakat sivil (CSOs) agar mereka ini juga tidak ketinggalan untuk mendapat pendedahan yang sama dengan pemimpin-pemimpin dalam sektor swasta dan sektor awam.

Dalam konteks ini, baru-baru ini saya dijemput sebagai salah seorang ahli panel dalam satu program Pembangunan Kepimpinan Pemimpin Komuniti di Sarawak.

Penganjuran program seperti ini menjadi sangat signifikan untuk memperkasakan pemimpin komuniti dan pertubuhan masyarakat sivil di dalam negara kita.

Forum satu hari anjuran bersama Pertubuhan Gagasan Minda Merdeka (GMM) dan Sarawak Community Leadership Development (ComLEAD) membincangkan tiga topik penting, yang pertama adalah menilai kepimpinan Abad ke-21 terutama tentang kepentingan untuk ada pemimpin yang berwawasan dan berprinsip dalam masyarakat.

Kedua, forum membincangkan mengenai kelestarian Alam Sekitar dan Masyarakat di Sarawak dan yang ketiga, forum tersebut telah mengupas peranan institusi pengajian tinggi dan agensi kerajaan dalam memperkasakan pemimpin tempatan sebagai pemacu perubahan masyarakat.

Sarawak, dengan populasi yang berbilang kaum dan kawasan yang luas serta pelbagai cabaran pembangunan, memerlukan kepimpinan dalam kalangan komuniti yang mampu melihat jauh ke hadapan untuk memastikan kemakmuran dan kesejahteraan semua penduduk terus terbelas.

Kita sedia maklum bagaimana seseorang pemimpin berwawasan, berprinsip dan berintegriti itu dapat merangka strategi jangka panjang yang mengambil kira pelbagai aspek pembangunan ekonomi, sosial serta infrastruktur di sesebuah tempat.

Di Sarawak, seperti yang kita sedia maklum pelaksanaan 'Sarawak Corridor of Renewable Energy' (SCORE) adalah salah satu contoh di mana kepimpinan berwawasan telah berjaya memperkasakan ekonomi negeri.

SCORE bertujuan untuk memanfaatkan sumber tenaga boleh diperbaharui seperti hidroelektrik, tenaga solar dan sumber lain bagi memacu pertumbuhan ekonomi dan membuka peluang pekerjaan kepada rakyat tempatan.

Pemimpin yang mempunyai visi seperti ini tidak hanya tertumpu kepada pembangunan fizikal semata-mata, tetapi juga melihat kepada pembangunan modal insan.

Mereka memahami bahawa untuk membangunkan komuniti secara mampan, rakyat perlu diberikan peluang untuk meningkatkan kemahiran dan pengetahuan mereka.

Ini dilaksanakan melalui pelbagai inisiatif latihan dan pembangunan kemahiran yang disediakan oleh kerajaan negeri Sarawak bagi memastikan tenaga kerja tempatan mampu bersaing dalam pasaran global.

Sarawak, dengan lebih daripada 30 etnik yang berlainan, memerlukan pemimpin dalam kalangan komuniti yang berwawasan dan berprinsip untuk memastikan kesejahteraan dan kesaksamaan sosial dalam kalangan rakyat.

Pemimpin yang berwawasan memahami keperluan untuk menghormati kepelbagaian ini dan merangka dasar yang inklusif.

Pemimpin seperti ini akan memastikan bahawa kemudahan asas seperti jalan raya, bekalan air bersih, elektrik, dan perkhidmatan kesihatan disediakan di kawasan yang sukar diakses, termasuk di kawasan pedalaman.

Ini penting untuk mengurangkan jurang pembangunan antara bandar dan luar bandar, serta untuk meningkatkan taraf hidup rakyat di kawasan yang sebelum ini terpinggir.

Kepimpinan yang berwawasan dan berprinsip di Sarawak juga akan memainkan peranan penting dalam memupuk integrasi antara kaum dan membina keharmonian sosial.

Di Sarawak, masyarakat daripada pelbagai kaum seperti Iban, Bidayuh, Melayu, Melanau, Cina, dan kaum-kaum lain hidup dalam suasana harmoni yang unik.

Malah tidak silap untuk kita jadikan Sarawak sebagai negeri model yang menjaga kerukunan dan perpaduan antara pelbagai suku etnik.

Seorang pemimpin yang berprinsip dan berintegriti memahami bahawa pembangunan yang berjaya tidak hanya tertumpu kepada pembangunan fizikal, tetapi juga melibatkan pembangunan sosial dan perpaduan masyarakat.

Mereka sedar bahawa sebuah masyarakat yang bersatu padu adalah prasyarat untuk kestabilan politik dan ekonomi yang mampan.

Semoga Sarawak terus maju dan makmur dalam Malaysia.

## 1.2. Menoktahkan kemiskinan di Malaysia

*Sinar Harian. 2024 Oct 10*

ADAKAH iltizam PMX untuk menoktahkan kemiskinan tegar dalam negara kita satu perkara yang mustahil untuk dicapai? Atau adakah usaha ini memerlukan sokongan semua lapisan masyarakat termasuk mereka yang ingin dibantu?

Kalau negara sebesar negeri China dengan penduduknya mencecah 1.4 bilion orang mampu menoktahkan kemiskinan mutlak di negara mereka seperti yang diumumkan oleh Presiden Xi Jinping dalam bulan Februari 2021, tidak mustahil untuk Malaysia dengan hanya 34 juta orang untuk mencapainya dalam masa terdekat.

Sebagai permulaan dalam membantu negara mencapai usaha ini, terdapat beberapa terminologi yang perlu kita semua fahami.

Kemiskinan multidimensi merujuk kepada keadaan di mana individu atau keluarga bukan sahaja kekurangan dari segi pendapatan, tetapi juga mengalami pelbagai bentuk kekurangan lain seperti pendidikan, kesihatan, keadaan tempat tinggal, dan akses kepada perkhidmatan asas.

Pendekatan ini melihat kemiskinan sebagai fenomena yang lebih kompleks berbanding sekadar pendapatan rendah, kerana ia melibatkan pelbagai dimensi kehidupan yang saling berkait dan memberi impak terhadap kesejahteraan keseluruhan individu atau keluarga.

Di Malaysia, kemiskinan biasanya diukur berdasarkan Poverty Line Income (PLI) atau Garis Kemiskinan Pendapatan.

Namun, mengira kemiskinan semata-mata berdasarkan PLI mungkin tidak cukup tepat untuk menangani masalah kemiskinan secara holistik kerana ia tidak mengambil kira faktor lain yang mempengaruhi kualiti hidup.

Di sinilah pendekatan kemiskinan multidimensi menjadi penting.

Kemiskinan multidimensi diukur dengan menggunakan Indeks Kemiskinan Multidimensi (MPI) yang diperkenalkan oleh Program Pembangunan Pertubuhan Bangsa-Bangsa Bersatu (UNDP).

Indeks ini mengukur kemiskinan bukan hanya berdasarkan pendapatan tetapi juga mengambil kira tiga dimensi utama, iaitu kesihatan, pendidikan, dan taraf hidup.

Setiap dimensi pula mempunyai beberapa petunjuk yang mewakili aspek-aspek penting dalam kehidupan individu.

Contohnya, dimensi kesihatan mengambil kira tahap pemakanan dan kematian bayi, manakala dimensi pendidikan melibatkan tahun persekolahan dan kadar keciciran.

Taraf hidup pula merangkumi akses kepada elektrik, air bersih, sanitasi, bahan api memasak, serta kualiti rumah.

Pendekatan ini memberikan gambaran yang lebih menyeluruh mengenai bentuk dan punca kemiskinan yang dialami oleh individu.

Sebagai contoh, sebuah keluarga yang mungkin berada di atas garis kemiskinan dari segi pendapatan, tetapi jika mereka tidak mempunyai akses kepada pendidikan yang baik, mereka masih dianggap miskin secara multidimensi.

Di Malaysia, PLI telah lama menjadi indikator utama dalam mengukur tahap kemiskinan.

Namun, terdapat peningkatan kesedaran bahawa kemiskinan bukanlah isu yang semata-mata berkisar tentang pendapatan.

Pada tahun 2020, kerajaan telah mengemas kini Garis Kemiskinan Nasional, di mana paras PLI dikemas kini kepada RM2,208 sebulan bagi setiap isi rumah, berdasarkan Kos Sara Hidup Minimum.

Walaupun PLI adalah alat yang penting untuk mengukur kemiskinan, ia gagal untuk menangkap pelbagai dimensi kemiskinan yang lebih halus seperti yang diukur oleh MPI.

Menggunakan pendekatan kemiskinan multidimensi bersama PLI boleh membantu kerajaan mengenal pasti kawasan dan kumpulan penduduk yang memerlukan bantuan yang lebih bersasar.

Sebagai contoh, negeri-negeri seperti Sabah dan Sarawak mempunyai kadar kemiskinan yang lebih tinggi jika diukur secara multidimensi kerana faktor seperti infrastruktur yang kurang memuaskan dan akses yang terhad kepada perkhidmatan asas.

Dengan memahami bahawa kemiskinan bukan hanya tentang pendapatan, dasar-dasar untuk membasmi kemiskinan di Malaysia harus melangkaui usaha untuk meningkatkan pendapatan sahaja.

Ini bermaksud, dasar sosial perlu merangkumi pembaikan dalam sektor pendidikan, kesihatan, dan pembangunan infrastruktur asas di kawasan-kawasan pedalaman atau terpinggir.

Pendekatan kemiskinan multidimensi menawarkan satu kaedah yang lebih menyeluruh untuk memahami kemiskinan dan mengenal pasti punca-puncanya.

Dalam konteks Malaysia, mengira PLI sahaja mungkin tidak cukup untuk menyelesaikan masalah kemiskinan yang semakin kompleks.

Oleh itu, dengan mengintegrasikan ukuran kemiskinan multidimensi dalam dasar-dasar sosial, Malaysia boleh mencapai sasaran yang lebih tepat dalam usaha membasmi kemiskinan secara menyeluruh.

Pendekatan ini bukan sahaja dapat meningkatkan kualiti hidup golongan miskin tetapi juga membantu dalam mewujudkan masyarakat yang lebih sejahtera dan inklusif.

### 1.3. Masjid tempat pelbagai fungsi

*Sinar Harian. 2024 Sept 26*

UMAT Islam di seluruh dunia pergi ke masjid terutamanya untuk solat lima waktu setiap hari, solat pada hari raya, dan kadang-kadang untuk majlis perkahwinan atau untuk solat jenazah.

Dalam bulan Ramadan, premis masjid digunakan untuk majlis berbuka puasa, solat Tarawih, dan ceramah-ceramah agama.

Baru-baru ini saya menulis bersama rakan setugas, Prof. Dr. Tariqur Rahman tentang bagaimana masjid boleh diimarahkan menjadi taman ilmu, gedung perniagaan dan pusat masyarakat.

Tulisan dalam bahasa Inggeris kami itu menjelaskan bagaimana konsep ibadah harus lebih daripada hanya solat yang dilakukan setiap hari.

Kita sedia maklum bahawa solat, seperti solat fardu lima waktu membantu umat Islam untuk menguatkan rohani mereka.

Kita juga sedia maklum bahawa ritual lain yang melibatkan masyarakat seperti majlis berbuka puasa, majlis perkahwinan, majlis tahlil dan doa untuk jenazah di premis masjid boleh membantu membina semula penglibatan sosial.

Malah, masjid boleh memainkan lebih banyak peranan daripada penglibatan berasaskan ritual semata-mata.

Selain masjid digunakan untuk mengajar membaca al-Quran serta mempelajari bahasa Arab, premis masjid boleh juga digunakan untuk mengajar bahasa-bahasa lain seperti Inggeris, Mandarin dan Tamil kepada kanak-kanak dan belia dalam masyarakat kita.

Bayangkan sebuah masjid menempatkan perpustakaan dengan buku bukan sahaja mengenai agama tetapi juga mengenai isu sejarah, sains sosial dan saintifik yang ditulis dalam format popular.

Itu akan menggalakkan ahli masyarakat termasuk kanak-kanak untuk datang mempelajari isu-isu kontemporari bersama-sama dengan ilmu nas-nas al-Quran.

Premis masjid juga boleh digunakan untuk perkhidmatan penjagaan kesihatan secara sukarela dengan menggunakan tenaga pakar dalam kalangan masyarakat.

Sekali setiap minggu atau bulan, pakar penjagaan kesihatan boleh menggunakan premis masjid untuk menyampaikan maklumat berkenaan isu-isu kesihatan dan mendengar masalah kesihatan daripada masyarakat.

Daripada sudut kerohanian pula, khidmat sukarela sebegini untuk membantu masyarakat tanpa mengharapkan ganjaran yang besar sebagai satu amalan seperti memberi sedekah jariah.

Amalan seperti ini akan mengeratkan lagi silaturahim sesama ahli masyarakat.

Daripada segi sejarah, Kaabah di tengah-tengah Masjidil Haram di Makkah telah menjadi tempat perniagaan dan perdagangan bukan sahaja untuk penduduk Makkah tetapi juga untuk penduduk dari sejauh Syria dan beberapa negara di Afrika.

Pada waktu ini ada beberapa buah masjid yang saya pernah lawati sudah menjadikan masjid sebagai pusat perniagaan dan perdagangan.

Cuma usaha seperti ini harus dilipat-gandakan dan kita tidak terhad kepada berjual beli secara fizikal sahaja malah premis masjid juga boleh digunakan untuk perdagangan dalam talian.

Dalam konteks pergantungan hari ini pada mesin carian berasaskan internet, adalah penting juga untuk membawa semua masjid di bawah payung rangkaian dalam talian di mana pengguna boleh capai maklumat tentang aktiviti masjid-masjid termasuk acara dan aktiviti yang dianjurkan oleh setiap masjid.

Bayangkan sebuah portal yang mempunyai maklumat lengkap tentang semua masjid-masjid dalam negara kita dari Perlis hingga ke Sabah dengan lokasi, kapasiti, aktiviti ceramah, kelas-kelas yang dianjurkan serta program kemasyarakatan yang melibatkan semua kaum di masjid.

Yang penting masjid bukan hanya tempat persinggahan tetapi menjadi destinasi masyarakat kita.



Dalam memikirkan tentang perlunya kita menjadikan masjid sebagai sebuah taman ilmu, gedung perniagaan dan pusat kesepaduan masyarakat, saya diingatkan pengalaman satu malam dalam musim perayaan Tahun Baharu Cina di mana pihak masjid di mana saya tinggal waktu itu, menjemput anak-anak masyarakat Cina yang ramai di sekeliling kawasan masjid itu untuk datang bermain mercun dalam kawasan tempat letak kereta masjid.

Alangkah indahnya Malaysia kalau kita semua dalam semangat Bangsa Malaysia, untuk menjadikan masjid benar-benar hidup dan diimarahkan - di luar sempadan penggunaannya yang terhad dan tradisional untuk tujuan ritual keagamaan - boleh menjadi lebih berguna bagi masyarakat setempat untuk menjadi pusat pertemuan masyarakat dalam sama-sama menangani masalah kesihatan, kewangan, dan pendidikan ahli komuniti tanpa melanggar etika dan adab penggunaan masjid dengan melibatkan ahli sukarelawan dalam kalangan masyarakat setempat untuk saling bantu-membantu tanpa mengira agama dan bangsa.

Masjid sebagai taman ilmu, gedung perniagaan, dan pusat tamadun masyarakat boleh memainkan peranan penting dalam pembangunan masyarakat dan pembinaan negara. Semoga Malaysia terus makmur dan berjaya.

#### 1.4. Teknologi perlu nilai-nilai murni

*Sinar Harian. 2024 Sept 12*

BARU-BARU ini saya dijemput untuk memberi pandangan dalam Persidangan Permulaan Rancangan Malaysia Ke-13 (RMK13) anjuran Kementerian Ekonomi.

Saya diminta untuk memberi pandangan dalam konteks transformasi teknologi dan keperluan untuk memperseimbangkannya dengan tatakelola baik.

Saya mulakan dengan menjelaskan bahawa teknologi adalah penggerak kepada pembangunan mana-mana negara.

Perubahan dalam teknologi telah membawa keperluan untuk mengubah undang-undang dan peraturan, amalan kerja dan juga budaya masyarakat.

Kita diberitahu bahawa perlu berkembang dengan perubahan teknologi, dan menjadi orang yang menentang perkembangan teknologi baharu bukanlah satu pilihan.

Di negara ini, kita telah melihat bagaimana kepesatan pembangunan bersandar kepada kemajuan teknologi.

Namun begitu, teknologi yang telah membawa transformasi ini juga boleh menjadi penyebab kepada kebergantungan tinggi kepada teknologi sehingga kita lupa kearifan tempatan dan pada masa yang sama ia juga boleh digunakan oleh pihak yang tidak bertanggungjawab untuk memporak-perandakan negara kita.

Cadangan saya pada persidangan tersebut, adalah biar apa pun yang kita ingin lakukan.

Teknologi secanggih mana pun yang kita ingin gunakan. Ia harus berpaksi kepada moral kompas kita yang utuh.

Integriti kita tidak boleh dikompromikan. Teknologi yang ingin kita gunakan itu perlu memberi tambahan nilai untuk memperbaiki negara kita. Ia perlu kepada nilai-nilai murni.

Terutama nilai-nilai yang datang daripada tadbir urus yang baik. Dua tahun lalu saya dijemput hadir oleh EPU semasa semakan separuh penggal RMK12 diadakan di mana saya bercakap tentang keperluan untuk menegakkan tadbir urus baik yang kukuh.

Pada persidangan permulaan RMK13 yang baru lalu ini saya juga memilih untuk bercakap tentang perkara yang sama.

Bukan kerana saya fikir tidak ada orang yang mendengar apa yang saya katakan dua tahun yang lalu, tetapi untuk menekankan betapa pentingnya tadbir urus baik atau tatakelola ini dan perlu diingatkan secara berterusan.

Hari ini kecerdasan buatan atau AI adalah perkataan yang biasa kita dengar.

Ke mana-mana sahaja kita pergi orang bercakap tentang AI. Dulu AI ini tidak kurang daripada hanya fiksi sains atau perkara yang hanya kita lihat dalam filem-filem Hollywood.

Kini kita boleh melihat kereta yang dipandu AI di jalan raya. AI di mana-mana dalam kehidupan kita, daripada menulis puisi kepada cadangan penyelidikan atau menyanyikan lagu - tiada apa yang tertinggal untuk dilakukan oleh AI.

AI sepatutnya digunakan untuk membantu kita menjalankan analitik untuk menyelesaikan krisis iklim, atau meramalkan kemunculan pandemik lain, atau membuat diagnosis awal penyakit seperti kanser, atau meramalkan kemungkinan kebuluran yang bakal menimpa bumi.

Apa yang penting pada kita adalah bagaimana kita mahu membina teknologi AI ini untuk kepentingan dan kebaikan masyarakat kita? ChatGPT akan kekal berada bersama kita, mungkin dengan kebolehan yang lebih canggih.

Kita tidak dapat mengelak untuk para pelajar di sekolah dan universiti daripada menggunakan ChatGPT ini untuk membantu mereka membuat kerja-kerja sekolah atau menulis kertas penyelidikan mereka.

Apa yang perlu kita ajar kepada para pelajar ini adalah untuk menggunakan teknologi ini dengan penuh bertanggungjawab.

Teknologi ini mempunyai AI yang dapat membantu para pelajar membuat penyelidikan dan kerjakerja analitik.

Kita perlu mengajar anak-anak kita tentang cara menggunakannya dengan bijak dan secara beretika. Bukan untuk memplagiat kerja orang lain dan dihantar sebagai hasil kajian yang baharu.

Teknologi, tidak kira betapa maju atau berkuasa, akhirnya hanya sebaik orang yang menggunakannya.

Prinsip garbage in garbage out (GIGO) mencerminkan kebenaran ini—jika kita memasukkan data yang lemah, amalan tidak beretika atau niat buruk, teknologi akan menghasilkan hasil yang cacat atau berbahaya.

Bukan teknologi itu sendiri yang mendorong kejayaan atau kegagalan, tetapi integriti dan nilai mereka yang mengendalikannya.

Sebab itu penting untuk kita memilih individu-individu yang beretika dan bertanggungjawab barulah teknologi itu boleh menjadi alat untuk kemajuan, inovasi dan perubahan positif.

Kalau orang yang diberi tanggungjawab itu tidak ada integriti, sistem yang paling canggih mana pun boleh disalahgunakan, dan akan membawa kepada akibat negatif.

Sebab itu penting penekanan dalam menyediakan RMK13 diberikan kepada pembinaan insan agar manusia yang ingin kita bentuk untuk menjayakan hasrat negara adalah orang-orang yang amanah, berintegriti, jujur dan ikhlas dalam melaksanakan tugas dan tanggungjawab mereka.

Semoga kita dapat menghasilkan lebih ramai pemimpin negara di semua peringkat dan sektor masyarakat yang bermoral dan berprinsip.

Semoga Malaysia terus maju. Selamat menyambut Hari Malaysia!

## 1.5. Akal budi Melayu semakin dilupakan

*Sinar Harian. 2024 Aug 29*

BARU-baru ini saya dijemput hadir mesyuarat jawatankuasa pemeriksa ijazah doktor falsafah seorang pelajar yang membuat kajian dalam bidang linguistik Melayu.

Jarang-jarang kita dengar pelajar di peringkat PhD membuat kajian dalam bidang ini.

Bidang ini kalau tidak dipelihara dengan baik dan dipopularkan kembali, mungkin bakal pupus.

Sahabat baik saya, Profesor James T Collins, seorang ahli linguistik Melayu dan pakar dialektologi Melayu di Asia Tenggara yang berasal dari Amerika Syarikat dan kini menetap di Kajang sering menjadi rujukan saya tentang perkara-perkara berkaitan linguistik Melayu ini. Pelik tapi benar.

Tapi itulah hakikatnya apabila kita orang Melayu hari ini mengambil mudah kepada bahasa sendiri, sedangkan orang luar lebih mengkaji dan mendalami serta menghayati keindahan bahasa kita.

Dalam mesyuarat jawatankuasa pemeriksa yang saya hadir itu, calon PhD tersebut memilih untuk mengkaji mengenai metafora dan perlambangan dalam bahasa Melayu.

Ia merupakan elemen penting terhadap keindahan dan kehalusan bahasa Melayu serta keseniannya.

Kedua-dua unsur ini bukan sahaja memperkayakan bahasa tetapi juga memberi kedalaman makna sesuatu ungkapan, menjadikannya lebih indah, halus dan bermakna.

Malangnya, hari ini jarang-jarang dapat kita baca penulisan menggunakan metafora dan perlambangan dalam menjelaskan pemikiran seseorang penulis.

Malah, hari ini jarang-jarang metafora digunakan untuk memperindahkan lagi lagu-lagu Melayu seperti dahulu kala.

Metafora ini adalah perbandingan langsung antara dua perkara yang berbeza tanpa menggunakan perkataan seperti 'seperti' atau 'bagai'.

Ia bertindak sebagai alat yang berkuasa dalam bahasa untuk menyampaikan makna mendalam dan pelbagai.

Contohnya, ungkapan 'lautan kehidupan' digunakan untuk menggambarkan liku-liku dan cabaran hidup tidak berkesudahan.

Metafora seperti ini memberikan gambaran lebih jelas dan mendalam tentang konsep kehidupan, dengan menimbulkan imej mental yang kuat dan menyentuh perasaan pendengar atau pembaca.

Dalam konteks kesenian Melayu, penggunaan metafora meluas dalam pelbagai bentuk seni seperti puisi, pantun dan syair.

Penyair Melayu lama sering menggunakan metafora untuk menyampaikan rasa cinta, rindu atau kesedihan dengan cara lebih halus dan puitis.

Misalnya, dalam pantun Melayu sering kali digunakan metafora alam seperti bunga, laut atau bulan untuk menggambarkan perasaan hati yang sukar diungkapkan dengan kata-kata biasa.

Penggunaan metafora ini bukan sahaja memperindahkan bahasa tetapi juga memberi dimensi lebih dalam kepada karya seni, menjadikannya lebih berkesan dan bermakna.

Secara keseluruhannya, metafora dan perlambangan memainkan peranan sangat penting dalam keindahan bahasa Melayu dan keseniannya.

Kedua-dua elemen ini memperkayakan bahasa, menjadikannya lebih puitis dan bermakna, sambil memelihara kehalusan budaya dan adat resam Melayu.

Penggunaan metafora dan perlambangan dalam bahasa dan kesenian Melayu bukan sahaja menambah kecantikan estetika tetapi juga mendalamkan penghargaan terhadap budaya Melayu, menjadikannya lebih relevan dan dihargai oleh generasi masa kini dan akan datang.

Dengan mengaplikasikan unsur-unsur ini, bahasa Melayu terus dilihat sebagai bahasa indah, kaya dengan makna dan penuh dengan kebijaksanaan yang diwarisi dari zaman-berzaman.

Seperti yang disebut dalam tunjuk ajar Melayu bahawa setiap percakapan atau berbahasa, walaupun menggunakan kiasan atau metafora, hendaklah mengandungi makna jelas. Di dalam ungkapan ada dikatakan:

“Santun berkata mengandungi makna,  
santun berbicara jelas maksudnya,  
santun berbincang maknanya terang,  
santun bermasalah fahamnya mudah.”

Orang tua-tua dahulu mengingatkan kita:

“Apabila berkata tiada bermakna,  
niat tak sampai orang kecewa,  
sebarang maksud tersia-sia.”

“Apabila bercakap tidak bermakna,  
bual selangit isinya hampa,  
siapa mendengar tentu tak suka,  
mulut berbuih hasil tak tak ada.”

“Apabila berbicara tak ada erti,  
cakap besar tiada berisi,  
orang mendengar akan cepat pergi,  
segala usaha tentu merugi.”

Sama-samalah kita memperkasakan akal budi Melayu yang semakin dilupakan ini.

Semoga usaha kita ini akan dapat mendaulatkan kembali penggunaan bahasa Melayu sebagai bahasa penghubung yang bukan sahaja mengutarakan pandangan dengan jelas tetapi mengandungi bait-bait indah yang tuntas.

## 1.6. Kebun peribadi sara diri

*Sinar Harian. 2024 Aug 01*

DALAM era yang ditandai dengan ketidaktentuan kepanasan global, turun naik ekonomi dan kebimbangan kita kepada nasib alam sekitar, keperluan untuk menyara diri setiap isi rumah dalam negara kita dalam konteks penghasilan makanan tidak pernah menjadi lebih mendesak daripada waktu ini.

Pandemik Covid-19 mendedahkan kelemahan rantai bekalan global, termasuk rangkaian pengedaran makanan, dan semua ini diakibatkan kebergantungan kita kepada bahan makanan yang diimport dari negara luar.

Data tahun 2023 menunjukkan negara kita berbelanja hampir RM79 bilion untuk mengimport bahan makanan.

Apa agaknya akan terjadi kepada kita sekiranya negara-negara yang biasa kita import ini menghadapi kekurangan hasil makanan dan ingin memberi tumpuan untuk menyara rakyat mereka?

Sebab itu pada hemat saya usaha untuk setiap isi rumah berdikari dalam pertanian perlu diberi perhatian oleh semua pihak.

Usaha ini bukan sahaja menggalakkan keselamatan makanan tetapi juga kemapanan alam sekitar, kestabilan ekonomi, dan daya tahan masyarakat kita.

Baru-baru ini saya bertemu dengan sahabat lama saya Tan Sri Abu Kassim Mohamed yang pada waktu ini menumpukan usaha beliau melalui Koperasi Kebuniti Selangor Berhad (Kobuniti) untuk mengajar masyarakat bandar yang berminat berkebun dan memulakan kebun peribadi bagi menyara diri.

Usaha-usaha seperti ini perlu diberi pujian dan sokongan ramai.

Banyak kebaikan yang kita dapat capai melalui usaha seperti ini.

Pertama sekali, sara diri dalam pertanian memastikan keselamatan makanan.

Isi rumah yang menanam sendiri buah-buahan, sayur-sayuran, dan juga menternak ternakan kecil boleh menampai terhadap gangguan dalam rantai bekalan makanan.

Bencana alam, konflik geopolitik dan wabak boleh memberi kesan teruk kepada import makanan, yang membawa kepada kekurangan dan kenaikan harga. Dengan menanam makanan mereka sendiri, keluarga boleh mengekalkan bekalan hasil segar yang stabil, mengurangkan risiko yang berkaitan dengan pergantungan luar. Berdikari ini bukan sahaja menjamin akses kepada makanan berkhasiat tetapi juga mengurangkan tekanan dan ketidakpastian semasa krisis.

Dari perspektif alam sekitar, makanan tempatan menawarkan faedah yang besar.

Pertanian perindustrian moden sering bergantung pada monokultur, penggunaan racun perosak yang berat, dan pengangkutan yang meluas, yang semuanya menyumbang kepada kemerosotan alam sekitar.

Sebaliknya, pertanian isi rumah berskala kecil menggalakkan kepelbagaian biologi, mengurangkan keperluan untuk bahan kimia berbahaya, dan meminimumkan jejak karbon yang dikaitkan dengan pengangkutan makanan.

Isi rumah yang mengamalkan kaedah pertanian mampan, seperti pengkomposan, penggiliran tanaman dan permakultur, boleh meningkatkan kesihatan tanah, menjimatkan air dan menggalakkan keseimbangan ekologi.

Pendekatan setempat terhadap pengeluaran makanan ini memupuk hubungan yang lebih harmoni dengan alam semula jadi, akhirnya memberi manfaat kepada planet ini.

Dari segi ekonomi, isi rumah yang berdikari boleh mengalami penjimatan yang ketara.

Kos hasil segar semakin meningkat, dan makanan yang diimport selalunya membawa premium disebabkan oleh pengangkutan dan tarif.

Dengan menanam makanan mereka sendiri, keluarga boleh mengurangkan bil runcit, menjadikan makanan sihat lebih berpatutan.

Selain itu, lebih hasil boleh dipelihara, dikongsi dalam komuniti, atau dijual, mewujudkan peluang untuk pendapatan tambahan.

Kemerdekaan ekonomi ini menguatkan isi rumah, menjadikan mereka kurang terdedah kepada turun naik pasaran dan kemelesetan ekonomi.

Ketahanan komuniti adalah satu lagi aspek penting dalam sara diri pertanian isi rumah.

Apabila beberapa isi rumah dalam komuniti terlibat dalam pengeluaran makanan, mereka mewujudkan rangkaian sokongan bersama.

Berkongsi benih, pengetahuan, dan lebih tanaman memupuk semangat kemasyarakatan dan kerjasama.

Taman komuniti, pasar tani tempatan dan koperasi makanan boleh muncul, meningkatkan perpaduan sosial dan mewujudkan sistem makanan tempatan yang mantap.

Walaupun idea setiap isi rumah untuk berdikari sepenuhnya dalam pertanian mungkin kelihatan menakutkan, tetapi untuk masa depan negara kita yang lebih terjamin, ianya menjadi sangat penting dan satu dasar negara untuk merealisasikan usaha ini perlu diadakan bagi membantu semua pihak melaksanakan dengan ilmu yang cukup melalui pendidikan dan sumber, seperti bengkel berkebun, perpustakaan benih dan komuniti dalam talian.

Semua ini boleh memperkasakan keluarga untuk memulakan perjalanan sara diri mereka.

Dengan menerima pendekatan ini, isi rumah bukan sahaja dapat melindungi kesejahteraan mereka sendiri tetapi juga menyumbang kepada masa depan negara yang lebih mampan dan berdaya tahan untuk semua.

## 1.7. Cara hidup orang yang tahu adab

*Sinar Harian. 2024 July 18*

ANTARA persoalan utama yang sering timbul dalam perbincangan saya dengan rakan-rakan adalah mengenai kehakisan budaya dan adab dalam masyarakat kita.

Dalam konteks kolum ini, terutama apabila kita membicarakan mengenai rintihan rakyat daripada pelbagai sudut, kita juga ditempelak dengan pelbagai kisah dan cerita tingkah laku rakyat negara ini yang tidak menunjukkan budaya tinggi dan adab sopan ketimuran kita.

Banyak laporan berita yang menunjukkan bagaimana vandalisme yang merosakkan harta benda awam.

Kerosakan alam sekitar yang terus tercemar oleh mereka yang membuang sampah secara tidak bertanggungjawab tanpa memikirkan tentang impak kepada persekitaran dan masyarakat sekeliling, sehinggalah kepada sikap acuh tidak acuh orang muda terhadap orang-orang tua di sekeliling mereka.

Semua ini menunjukkan kehakisan hormat pada budaya dan adab ketimuran kita.

Untuk berlaku adil kepada semua pihak, kolum hari ini ingin mengingatkan kita semua tentang betapa pentingnya untuk menjaga adab, budaya dan akal budi bangsa kita.

Baru-baru ini saya dan isteri menghadiri majlis perkahwinan anak seorang sahabat baik kami di negara tetangga kita.

Majlis akad nikah yang kami hadiri pada petang tersebut sangat menyentuh hati kerana pengisian majlis dengan budaya yang penuh beradab dan bersopan dengan menjunjung tinggi agama dari permulaan majlis.

Majlis bermula dengan perarakan masuk pengantin lelaki yang diapit oleh ibu dan bapa beliau.

Di pintu masuk di mana majlis akad nikah akan diadakan, bapa pengantin lelaki menyampaikan ucapan salam dan menyatakan hajat untuk menyerahkan anak lelaki mereka bagi dijadikan suami kepada pengantin perempuan.

Kandungan ucapan tersebut sangat menyentuh hati saya kerana ungkapan yang dilafazkan datang daripada hati yang luhur si bapa yang mahu anak lelaki beliau menjadi suami yang bertanggungjawab kepada bakal menantu perempuan mereka.

Ucapan itu kemudiannya disambut oleh bapa pengantin perempuan dengan penuh beradab.

Mereka menyatakan menerima bakal menantu tersebut menjadi ahli keluarga besar mereka dan mengalu-alukan seluruh ahli keluarga pihak lelaki ke majlis pernikahan tersebut.

Dalam majlis-majlis perkahwinan kita di Malaysia, ada juga ucapan-ucapan seperti ini tetapi selalunya hanya ucapan terima kasih kepada yang hadir oleh bapa pengantin yang menganjurkan majlis resepsi tersebut.

Majlis di negara jiran kita ini agak berbeza. Selepas pengantin lelaki duduk di meja di mana beliau akan dinikahkan oleh bakal bapa mertuanya, barulah diumumkan ketibaan pengantin perempuan.

Pengantin perempuan itu pula masuk dengan mengucapkan salam dan menzahirkan terima kasih beliau kepada ibu bapa yang telah membesarkan dirinya.

Beliau juga menyatakan hasrat untuk berkahwin dengan lelaki pilihan dan memohon restu daripada kedua-dua orang tuanya.

Ibu bapa pengantin perempuan kemudiannya memberi ucapan balas dengan memberi restu dan mendoakan kebahagiaan anak perempuan mereka dan bakal menantu.

Semua ini dilakukan di khalayak dan semua yang hadir menjadi saksi kepada ucapan-ucapan dan janji-janji yang diungkapkan dengan penuh bermakna.

Ucapan-ucapan ini tidaklah panjang berjela tetapi padat dan cukup bermakna serta meninggalkan kesan yang mendalam kepada semua yang mendengarnya.

Majlis menjadi penuh bernilai dan akad nikah pada petang tersebut menjadi sangat berharga.



Itu belum lagi diceritakan bagaimana pengantin lelaki diminta untuk membaca ayat-ayat al-Quran dan pengantin perempuan pula disuruh membaca tafsir kepada sebahagian ayat dalam surah ar-Rahmaan dan surah an-Nisa yang telah dibaca oleh pengantin lelaki tadi.

Ayat-ayat al-Quran ini memberi erti yang sangat mendalam kepada kehidupan dan perkahwinan. Ini cara orang yang tahu adab. Mereka meletakkan agama dan al-Quran pada tempatnya dan pengajaran daripada al-Quran itu menjadi pedoman dalam hidup kita.

Semoga kita semua dapat mengembalikan adab dan budaya dalam masyarakat kita yang berteraskan agama dan al-Quran.

## 1.8. Bina kepercayaan rakyat

*Sinar Harian. 2024 July 04*

BARU-baru ini saya dijemput hadir dalam satu perbincangan untuk memberi input kepada Rancangan Malaysia ke-13.

Untuk mencadangkan tumpuan dan keutamaan yang perlu diberikan oleh pihak kerajaan, terlebih dahulu perlu untuk kita tahu ialah masalah yang mendepani negara dan yang menjadi kebimbangan rata-rata rakyat Malaysia.

Sekiranya kita melihat dari sudut ekonomi, sudah pasti kita sedia maklum bahawa ekonomi negara telah dipengaruhi oleh beberapa faktor dan berikut adalah tiga kebimbangan utama rakyat Malaysia:

Yang pertama, suka atau tidak, persoalan kos sara hidup menjadi salah satu kebimbangan utama rakyat. Ini termasuk kenaikan harga barangan dan perkhidmatan penting seperti makanan, perumahan, penjagaan kesihatan dan pendidikan.

Ramai rakyat Malaysia merasakan bahawa pendapatan mereka tidak seiring dengan peningkatan kos sara hidup dan ini menyukarkan untuk mereka menampung kehidupan.

Yang kedua kita melihat kurangnya peluang pekerjaan. Sama ada seseorang itu memilih kerja atau memang sukar untuk mereka mendapat pekerjaan boleh kita persoalkan.

Namun yang jelas, ada keperluan untuk mendidik rakyat kita untuk tidak mengharap diberi pekerjaan tetapi mencipta pekerjaan untuk diri sendiri.

Apa pun saranan kita, persepsi masyarakat rata-rata merasakan bahawa kekurangan pasaran pekerjaan masih menjadi kebimbangan yang ketara, terutamanya dalam kalangan belia dan graduan.

Yang ketiga adalah kesan daripada dasar-dasar kerajaan. Rakyat Malaysia prihatin terhadap dasar kerajaan dan kesannya terhadap ekonomi. Dasar yang berkaitan dengan cukai, subsidi dan pembaharuan ekonomi boleh mempengaruhi belanjawan isi rumah dan operasi perniagaan secara langsung.

Baru-baru ini ada seorang ahli ekonomi yang membuat perbandingan bagaimana tidak adilnya dasar kerajaan kerana Makcik Kiah membeli kereta Viva tetapi harus membayar semua cukai, sedangkan orang kaya yang membeli kereta elektrik (EV) tidak dikenakan cukai.

Kenyataan seperti ini sudah pasti akan mendapat sokongan dan dukungan ramai dalam kalangan masyarakat.

Namun kalau kita memberi penelitian secara mendalam kita akan lebih memahami bahawa dasar untuk memberi pengecualian cukai kepada kereta EV itu bertujuan untuk menangani masalah pencemaran alam dan membantu negara mencapai Matlamat Pembangunan Mampan.

Persoalannya di sini, adilkah untuk kita membuat perbandingan seperti di atas sedangkan dasarnya adalah untuk menyelesaikan masalah lain dalam negara?

Namun kebimbangan seperti ini mencerminkan kebimbangan yang lebih luas tentang kestabilan ekonomi, ketidaksamaan pendapatan, dan hala tuju keseluruhan dasar ekonomi di Malaysia. Cuma kita perlu lebih adil dalam membuat perbandingan.

Berdasarkan kebimbangan di atas ada beberapa kepentingan untuk kita melihat apakah penyelesaian yang dapat membantu kerajaan bagi meringankan beban rakyat biasa ini.

Antaranya adalah fokus untuk mewujudkan lebih banyak peluang pekerjaan, terutamanya dalam sektor yang mempunyai kadar pengangguran yang tinggi. Kita boleh melibatkan pelaburan dalam projek infrastruktur, sokongan untuk perusahaan kecil dan sederhana (PKS) dan inisiatif untuk menarik pelaburan langsung asing (FDI) yang menjana pekerjaan tempatan.

Saya pasti usaha-usaha ini sudah mula dilaksanakan oleh pelbagai agensi kerajaan dan perlu diteruskan.

Kita juga perlu memperkukuhkan jaringan keselamatan sosial untuk menyokong kumpulan yang bekerja sendiri dan mereka yang bekerja di dalam ekonomi jangka pendek atau ekonomi sementara.

Ini termasuk penyediaan bantuan kewangan yang disasarkan, subsidi penjagaan kesihatan, dan inisiatif perumahan mampu milik.

Kita juga perlu pastikan dasar ekonomi adalah inklusif dan memberi manfaat kepada semua segmen masyarakat, terutamanya dalam menangani ketidaksamaan pendapatan.

Ini mungkin melibatkan kajian semula dasar percukaian untuk memastikan percukaian progresif, menggalakkan akses saksama kepada pendidikan, pembangunan kemahiran, dan memupuk persekitaran perniagaan yang menyokong pertumbuhan inklusif. Saya pasti semua ini juga sudah dilaksanakan oleh pihak kerajaan.

Namun usaha yang paling penting adalah untuk meningkatkan ketelusan dalam perbelanjaan kerajaan dan proses membuat keputusan untuk membina kepercayaan dalam kalangan rakyat.

Ini boleh termasuk langkah-langkah untuk memerangi rasuah dan memastikan sumber awam digunakan dengan cekap dan berkesan untuk faedah rakyat.

Kita doakan semoga kerajaan boleh berusaha untuk meringankan beban rakyat sambil memupuk ekonomi yang lebih berdaya tahan dan inklusif di Malaysia.

## 1.9. Pentingnya pendidikan muzik

*Sinar Harian. 2024 June 20*

PENDIDIKAN muzik sebahagian daripada kurikulum sekolah rendah, bertujuan memperkayakan pengalaman pembelajaran murid.

Ia memberikan mereka kesempatan mengembangkan kemahiran muzik, kepekaan kepada budaya dan membina tahap apresiasi terhadap muzik itu sendiri melalui aktiviti seperti nyanyian, bermain alat muzik serta mendengar muzik.

Persoalannya, adakah apa yang diajar di sekolah rendah hari ini sudah mencukupi untuk anak murid ini terus mengembangkan minat dalam bidang muzik di peringkat sekolah menengah? Berapakah pula kos perlu dibiayai ibu bapa sekiranya inginkan anak mereka meneruskan minat dalam bidang muzik?

Persoalan lebih penting, adakah semua ibu bapa di Malaysia mampu membiayai kos pendidikan muzik di peringkat menengah? Atau adakah muzik akhirnya menjadi satu lagi alat membezakan status sosial masyarakat.

Minggu ini Rintihan Rakyat ingin mengupas kepentingan muzik dan pendemokrasiannya agar semua rakyat tidak kira kedudukan boleh mendapat pendidikan muzik yang sama rata.

Mengikut kajian peringkat sarjana oleh Nik Aida Nik Mahmood (2014), sebahagian besar pelajar dalam sampel kajiannya didapati tidak menguasai kemahiran-kemahiran muzik yang sepatutnya dikuasai oleh mereka ketika berada di peringkat sekolah rendah.

Bersandarkan kajian itu, mungkin ada keperluan bagi Kementerian Pendidikan Malaysia (KPM) menjalankan kajian keberkesanan pelaksanaan pengajaran dan pembelajaran pendidikan muzik di sekolah rendah agar keberkesannya mencapai piawaian diharapkan.

Ini kerana pendidikan muzik di sekolah rendah terkandung sebagai sebahagian dalam falsafah pendidikan negara kita yang telah dilaksanakan sejak 1960-an lagi.

Baru-baru ini ketika saya melawat sebuah galeri seni di Pulau Pinang, saya terjumpa buku teks semasa bersekolah rendah pada 1970-an – merupakan Siri Buku-Buku Sekolah DBP Bil.121 dengan tajuk Mari Kita Menyanyi. Ia bukti bahawa pendidikan muzik telah bertapak lama dalam sistem pendidikan negara kita.

Di Malaysia hari ini, KPM menetapkan kurikulum merangkumi pendidikan muzik sebagai salah satu subjek dalam Kurikulum Standard Sekolah Rendah (KSSR).

Ia diharap dapat mendedahkan pelajar kepada pelbagai jenis muzik termasuk muzik tradisional Malaysia bertujuan memupuk penghargaan terhadap kepelbagaian budaya.

Ia sangat penting untuk negara seperti Malaysia yang mempunyai masyarakat berbilang etnik. Persoalannya, adakah apa yang diharapkan itu telah dicapai? Kita semua sedia maklum kesan positif melalui pendidikan muzik.

Ia mampu memupuk semangat patriotik kebangsaan dan rasa cinta kepada negara. Muzik boleh menyatukan pelbagai bangsa.

Pembelajaran muzik di sekolah juga boleh menjadi satu dimensi lain untuk memberi peluang kepada pelajar mencapai kejayaan kerana tidak semua pelajar cemerlang dalam akademik tetapi mereka mungkin cemerlang dalam bidang muzik dan ia perlu dikembangkan di peringkat sekolah menengah.

Salah satu matlamat pendidikan muzik ialah mewariskan budaya sesuatu bangsa kepada generasi muda. Bagaimana mungkin warisan ini dapat diperturunkan sekiranya generasi hari ini tidak mampu menghayati dan mengapresiasi muzik.

Lebih malang lagi kalau mereka buta muzik dan tidak mampu membaca nota muzik serta bermain alat muzik warisan zaman.

Melalui pengajaran muzik, guru dapat mencungkil bakat terpendam pelajar. Potensi dan bakat itu sama pentingnya dengan potensi dan bakat lain seperti linguistik, matematik dan lain-lain subjek yang boleh dicungkil daripada peringkat awal persekolahan.

Muzik juga salah satu cara menyalurkan sumber tenaga kreatif semula jadi. Ia memberi peluang seseorang meluahkan perasaan secara sihat, sekali gus membantu mengurangkan tekanan dan mengimbangi emosi.

Semua itu penting untuk Malaysia, sebab itu kita perlukan satu polisi baharu untuk merakyatkan pendidikan muzik dalam kalangan masyarakat yang akan menangani semua persoalan dikemukakan di atas. Semoga Malaysia terus maju.

## 1.10. Tanggungjawab kepada diri sendiri

*Sinar Harian. 2024 June 06*

ANTARA penyakit yang tersebar luas di Malaysia adalah penyakit kardiovaskular atau CVD.

Di Malaysia dalam tahun 2019, CVD direkodkan pada kadar yang membimbangkan iaitu sebanyak 32.7 peratus (5.8 juta).

Menurut Kementerian Kesihatan Malaysia, CVD kekal sebagai punca utama kematian sejak 1980-an sehingga ke hari ini.

Pada tahun 2019, 15 peratus (%) daripada 109,164 kes kematian yang diperakui secara perubatan adalah disebabkan oleh penyakit arteri koronari, dan ini adalah 2.5 kali lebih banyak daripada gabungan semua kematian berkaitan kanser.

Malaysia adalah antara negara yang mempunyai kes tertinggi faktor risiko CVD iaitu melalui hipertensi, diabetes, dan hiperkolesterolemia.

Menurut Kajian Kesihatan dan Morbiditi Kebangsaan (NHMS), kes hipertensi di Malaysia telah meningkat daripada 34.6 peratus pada 2006 kepada 35.3 peratus menjelang 2015, dan ini merupakan penyumbang tertinggi kepada risiko CVD.

Laporan Pencegahan CVD oleh Kementerian Kesihatan dalam tahun 2017 mengkategorikan faktor risiko yang dikaitkan dengan CVD kepada dua, iaitu 1) faktor risiko yang tidak boleh diubah suai dan 2) faktor risiko yang boleh diubah suai.

Faktor risiko yang tidak boleh diubah suai termasuk peningkatan umur, jantina, sejarah keluarga CVD pramatang, serta etnik.

Faktor risiko yang boleh diubah suai pula termasuk diet atau corak pemakanan, hipertensi, merokok, kurang aktiviti fizikal, hiperkolesterolemia, dislipidemia, diabetes mellitus, berat badan berlebihan dan obesiti, dan risiko metabolik kardio.

Kelaziman faktor risiko biasa yang boleh diubah suai ini adalah tinggi dan menunjukkan trend peningkatan yang mengganggu.

Rakyat terbanyak terutama yang sedang menghadapi masalah kesihatan ini perlu mencuba untuk memperbaiki kehidupan mereka dalam konteks menangani faktor risiko yang boleh diubah suai dan diperbaiki.

Lebih daripada satu faktor risiko CVD yang boleh diubah suai terdapat dalam peratusan besar orang dewasa Malaysia, contohnya, 43.2% mempunyai sekurang-kurangnya dua daripada faktor risiko yang dinyatakan di atas.

Ada sebab penting untuk kita membicarakan isu ini di khalayak agar semua pihak dapat memainkan peranan masing-masing dalam menentukan negara mempunyai rakyat yang sihat.

Antara sebab selain penderitaan dan kematian sebilangan besar rakyat Malaysia akibat CVD, anggaran beban kos kegagalan jantung di Malaysia ialah AS\$481.9 juta setahun,

Walaupun kita sedia maklum tiada apa boleh dilakukan tentang faktor risiko yang tidak boleh diubah suai, langkah segera harus diambil untuk mengurangkan faktor risiko yang boleh diubah suai yang membawa kepada CVD.

Ini boleh dikatakan satu tugas yang sukar, berjaya hanya dengan kerjasama dan keazaman semua peringkat masyarakat - daripada individu itu sendiri, ke tempat kerja dan komuniti, kepada dasar kerajaan.

Ada beberapa cadangan yang boleh dibuat untuk membendung kelaziman faktor risiko CVD daripada meningkat bagi faktor yang boleh diubah suai di Malaysia.

Di peringkat individu, adalah menjadi tanggungjawab setiap individu untuk menjaga kesejahteraan rohani mereka, kesejahteraan psikologi dan juga kesejahteraan fisiologi.

Apa yang dimaksudkan sebagai kesejahteraan rohani dan psikologi? Ianya termasuklah mengamalkan kesederhanaan, menjalani kehidupan yang seimbang dan sihat, dan bertenang dalam apa jua situasi yang tidak menentu dan pada waktu ketegangan tinggi.

Semua ini dapat membantu ke arah memiliki jantung yang sihat dan kekal jauh daripada faktor risiko tinggi terutamanya hipertensi, yang akhirnya boleh membawa kepada CVD.

Selanjutnya, seseorang individu itu harus berusaha keras untuk mengubah tabiat biasa yang boleh menyebabkan CVD, seperti merokok, mengambil alkohol atau gula yang berlebihan, dan tidur yang tidak mencukupi.

Individu dengan isu mental yang teruk seperti kemurungan atau kebimbangan harus mendapatkan bantuan profesional jika perlu.

Pendek kata, individu perlu bertanggungjawab ke atas diri mereka terlebih dahulu sebelum mereka mampu membantu orang lain di sekeliling mereka.

Kemungkinan untuk akauntabiliti individu tidak berkesudahan, selagi mereka dimaklumkan dengan betul tentang bahaya tersembunyi CVD.

Mungkin lebih ramai pakar perubatan akan dapat berkongsi dengan rakyat terbanyak mengguna bahasa yang mudah untuk difahami oleh rakyat agar orang biasa juga dapat memainkan peranan membantu kerajaan dalam menangani masalah yang membunuh rakyat Malaysia tanpa kita sedar.

Kesedaran semua pihak akan dapat menyelamatkan keadaan. Semoga semua rakyat Malaysia terus kekal sihat dan sejahtera.

### 1.11. Ada apa di Rusia?

*Sinar Harian. 2024 May 23*

BARU-BARU ini saya telah dijemput untuk memberi beberapa syarahan di Kazan, Republik Tartastan, Rusia dan menyertai beberapa panel perbincangan di The XV International Economic Forum atau lebih dikenali sebagai "Rusia – Islamic World: KazanForum" 2024 yang diadakan dari 14-18 Mei baru-baru ini.

Melalui KazanForum ini bukan sahaja Republik Tartastan membuka pintu mereka kepada negara-negara OIC, malah ia juga telah membuka peluang kerjasama secara terus antara Rusia dengan Malaysia.

Semasa Forum ini juga Universiti Malaya telah menandatangani MoU bersama Kazan Federal University sebagai tanda kerjasama di mana Institut Antarabangsa Polisi Awam dan Pengurusan (INPUMA), Universiti Malaya telah dipilih untuk menyediakan kursus khas dalam polisi awam dan kewangan Islam sebagai pendedahan kepada pegawai kanan Republik Tartastan.

Saya juga diberi kesempatan untuk mengadakan pertemuan dengan Timbalan Perdana Menteri merangkap Menteri Ekonomi Republik tersebut yang akan mengetuai delegasi ke Malaysia dalam bulan Ogos nanti untuk menyertai kursus khas anjuran INPUMA.

Dalam pertemuan itu, Timbalan Perdana Menteri Republik Tartastan, Midhat Shaghiakhmetov telah menyatakan keyakinan beliau bahawa lawatan sambil belajar bagi menghadiri kursus di Malaysia ini akan mendatangkan manfaat kepada mereka berdasarkan program yang telah disediakan dengan teliti oleh pihak INPUMA.

Lawatan pertama kali saya ke Rusia, terutama ke Republik Tartastan ini telah membuka mata saya untuk melihat peluang penting untuk rakyat Malaysia mengadakan kerjasama dalam pelbagai bidang.

Republik Tartastan antara negeri di bawah kerajaan Rusia yang sedang berkembang pesat ekonominya sudah tentu mempunyai keupayaan untuk melabur dalam pelbagai sektor yang boleh memberi manfaat kepada kepentingan wilayah mereka.

Mereka juga antara beberapa buah negeri di bawah Rusia yang mempunyai ramai penduduk beragama Islam.

KazanForum yang baru berlangsung ini dilihat sebagai usaha mereka untuk mendekati negara-negara Islam.

Semasa melawat Akademi Islam Bolgar, saya telah diberi taklimat bagaimana ramai penduduk Muslim di Republik Tartastan sedang berusaha untuk belajar mengenai Islam.

Kompleks Akademi yang dilengkapi dengan pelbagai kemudahan teknologi tinggi serta guru-guru yang dibawa dari merata pelosok dunia semata-mata untuk melahirkan lebih ramai cerdik pandai dalam kalangan rakyat Republik tersebut untuk mengembangkan Islam.

Daerah Bolgar yang saya lawati adalah tapak warisan UNESCO kerana di sinilah Islam mula bertapak di Rusia apabila Islam diterima secara sukarela oleh pemerintah di sini pada tahun 922.

Daerah Bolgar ini kini menjadi tempat tarikan utama pelancongan kerana di sini banyak terdapat tinggalan sejarah Islam ketika Islam mula bertapak di Rusia.

Antara bahan simpanan penting yang terdapat dalam salah sebuah muzium di daerah Bolgar ini adalah sebuah al-Quran yang diterbitkan di Itali dalam tahun 2011 dan telah direkodkan sebagai al-Quran yang terbesar di dunia.

Ia berukuran 2 meter tinggi, 1.52 meter lebar dengan ketebalannya pada 0.17 meter. Al-Quran tersebut adalah hadiah kerajaan Rusia sebagai tanda sokongan kepada usaha Republik Tartastan untuk mengembalikan kegemilangan Islam di wilayah tersebut.



Mungkin ada cerdik pandai, agamawan, dan hartawan di Malaysia yang dapat membantu menyumbang kepakaran dan harta mereka dalam usaha untuk mengembangkan ilmu Islam di Rusia agar kandungannya akan dapat membantu memajukan Republik tersebut daripada hanya ritual dan pembinaan monumen sahaja.

Selain daripada pengembangan Islam, saya juga melihat Kazan mempunyai potensi untuk kita juga belajar daripada mereka terutama tentang bagaimana untuk memulihara bangunan-bangunan bersejarah lama yang berusia beratus tahun.

Dalam lawatan saya ke sebuah galeri lukisan di Kazan, saya dapat melihat mereka mempunyai koleksi pelbagai lukisan dari abad ke-13, 14, 15 dan 16 yang masih terjaga rapi.

Di galeri lukisan ternama di Moscow, seperti Galeri Tretyakov pun saya hanya melihat koleksi lukisan dari abad ke-17 dan 18 dan yang lebih moden sahaja.

Terdapat terlalu banyak salah faham dan persepsi buruk mengenai Rusia yang kita baca dan dengar melalui media Barat yang dikuasai Amerika Syarikat.

Mungkin ini masanya untuk kita mengubah persepsi tersebut dengan kita sendiri pergi melawat ke sana dan membuat kesimpulan sendiri daripada mempercayai apa yang kita baca dan dengar.

Lawatan pertama saya ke Rusia ini telah mengubah persepsi saya.

### 1.12. Bersedia depani cabaran negara tua

*Sinar Harian. 2024 May 09*

MALAYSIA sedang menuju status negara tua menjelang 2030.

Kenyataan ini disokong melalui laporan Jabatan Statistik Malaysia apabila peratusan penduduk dikategorikan sebagai warga emas (berumur 65 tahun dan lebih) telah meningkat kepada 7.3 peratus pada 2022 berbanding 7.0 peratus (2021).

Ini bermakna kita berdepan pelbagai masalah baharu dalam masyarakat.

Persoalannya, sudah bersediakah kita untuk mendepani semua cabaran ini?

Peningkatan ini tidak boleh disamakan dengan kesan positif dalam peningkatan jangka hayat rakyat Malaysia hari ini pada usia 74.8 tahun.

Peningkatan yang ini memberi petunjuk bahawa sistem kesihatan dalam negara kita jauh lebih baik sekarang dalam menjaga kesihatan rakyatnya untuk hidup lebih lama berbanding negara-negara sedang membangun di mana jangka hayat purata mereka berada pada usia 64 tahun.

Di negara-negara lebih membangun, jangka hayat penduduk mereka untuk lelaki ialah 75 tahun dan wanita pada usia 82 tahun harus menjadi sasaran kita selepas ini.

Bermakna kita perlu fikirkan keperluan negara dalam menghadapi negara menua ini.

Apakah keperluan-keperluan tersebut? Sudah tentu banyak.

Kita boleh melihat negara-negara di Asia yang sudah dilihat mencapai tahap tersebut seperti Jepun dan Korea Selatan.

Penekanan kepada penjagaan dan kesejahteraan rakyat mereka diberi keutamaan.

Kita amat mengalu-alukan usaha Kementerian Wanita untuk mengadakan pelan tindakan industri penjagaan di Malaysia. Ini adalah satu inisiatif kerajaan yang sangat baik.

Dalam konteks sama, baru-baru ini saya telah dijemput oleh Caring for Life Training Centre untuk menyampaikan ucapan perasmian dan menyampaikan sijil dalam majlis tamat latihan bakal penjaga profesional.

Seramai 25 orang pelatih yang bekerja keras menunjukkan dedikasi dan komitmen tinggi mereka untuk menjadi penjaga mahir berjaya menamatkan kursus selama lebih enam bulan.

Dalam konteks majlis tersebut, saya bukan sahaja teruja dengan penganjur, sukarelawan yang membantu mahupun para pelatih yang menunjukkan kesungguhan dan komitmen tinggi, tetapi lebih daripada itu apabila melihat tanda-tanda harapan negara ini ke arah membina masyarakat yang lebih mempunyai perasaan belas kasihan, empati dan bersedia saling bantu membantu.

Dalam dunia berkembang pesat di mana landskap demografi sedang beralih ke arah masyarakat berumur seperti Malaysia, peranan seseorang penjaga terlatih tidak pernah menjadi lebih penting daripada waktu ini.

Inilah yang saya maksudkan di awal kolum ini tadi bagaimana kita perlu menyaksikan peningkatan bilangan warga emas dalam negara yang melayakkan mereka juga mendapat penjagaan, penghormatan dan maruah terbaik terutama dalam usia emas.

Dalam ucapan, saya ada sebutkan bagaimana sebagai penjaga, para pelatih ini nanti bukan sahaja individu yang memberikan bantuan dengan tugas harian - mereka juga adalah teman, suar harapan, sumber penyelesaian dan tiang kekuatan bagi mereka memerlukan.

Peranan penjaga ini melampaui penjagaan fizikal, merangkumi sokongan emosi, persahabatan dan advokasi untuk kesejahteraan warga tua ini.

Kepentingan seorang penjaga dan pengasuh yang terlatih tidak boleh dipandang rendah.

Pengetahuan, kemahiran dan sifat empati mereka secara langsung akan memberi kesan kepada kualiti hidup yang dijaga.

Sebab itu sangat penting untuk kerajaan bekerjasama dengan badan-badan masyarakat sivil ini agar sistem latihan dan pensijilan yang dikeluarkan adalah menepati standard antarabangsa. Ini adalah untuk kebaikan semua pihak.

Saya juga mengingatkan para peserta untuk meneruskan usaha menimba ilmu kerana pembelajaran sepanjang hayat dan pembangunan profesional yang berterusan adalah penting dalam mengikuti amalan terbaik.

Terdapat banyak trend baharu muncul dengan kemajuan dalam penjagaan kesihatan memerlukan semua pihak untuk terus mengembangkan pengetahuan mereka, memperhalusi kemahiran, dan memupuk empati dalam interaksi dengan mereka yang di bawah penjagaan, agar yang dijaga terus merasa dihormati dan maruah diri mereka terus terpelihara.

Inilah sifat 'ihsan' sebenar yang perlu ditunjukkan semua pihak dalam konteks masyarakat madani hari ini.

Kita doakan agar lebih ramai rakyat kita akan menjadi orang yang memberi kebaikan dan rahmat kepada orang lain.

### 1.13. Tangani kesesakan lalu lintas

*Sinar Harian. 2024 March 28*

PADA bulan Ramadan, ramai ibu bapa yang bekerja akan bergegas pulang untuk menyiapkan juadah berbuka puasa bersama keluarga. Tidak kira sama ada yang singgah ke bazar Ramadan atau pulang untuk memasak.

Sebab itu kebanyakan pejabat membenarkan pekerja mereka masuk bertugas lebih awal daripada biasa dan pulang juga lebih awal pada bulan puasa. Malangnya keluar pejabat lebih awal tidak menjanjikan akan sampai ke rumah tepat pada waktu dihajatkan. Ramai pekerja itu terutama yang tinggal di kota-kota besar harus bertarung dengan kesesakan lalu lintas.

Kita sedia maklum dengan bandar sibuk dan ekonomi semakin berkembang, Malaysia menghadapi cabaran berterusan yang mengecewakan ramai pengguna jalan raya. Masalah kesesakan lalu lintas telah melanda jalan raya Malaysia selama bertahun-tahun menyebabkan kerugian ekonomi yang ketara, pencemaran alam sekitar, dan tekanan peribadi.

Bagi mengurangkan isu tersebut dan membuka jalan kepada pengangkutan yang lebih lancar, penting untuk kita meneliti punca kesesakan serta melaksanakan penyelesaian berkesan. Saya pasti semua itu telah dibuat. Persoalannya, kenapa jalan raya kita masih sesak?

Penyumbang utama ialah per-bandaran yang pesat dan pertumbuhan penduduknya. Bandar seperti Kuala Lumpur dan Pulau Pinang telah menyaksikan lonjakan penduduk serta kenderaan, memberikan tekanan besar kepada infrastruktur jalan raya sedia ada.

Akibatnya, jalan raya menjadi sesak pada waktu puncak menyebabkan masa perjalanan yang panjang. Pilihan pengangkutan awam tidak mencukupi memburukkan lagi masalah. Walaupun Malaysia telah mengorak langkah membangunkan sistem transit awam termasuk rangkaian Transit Aliran Ringan (LRT) dan Transit Aliran Massa (MRT), ia sering mengalami kekangan kapasiti.

Lebih malang apabila ia menghadapi masalah sambungan antara LRT dan MRT dengan pengangkutan awam lain bagi menentukan pengguna dapat sampai ke destinasi dituju.

Ada ketikanya untuk seseorang guna pengangkutan awam, mereka masih perlu memandu kereta ke stesen dan membayar kos parkir atau kos naik teksi atau Grab ke stesen – menambah kos untuk guna pengangkutan awam.

Oleh sebab itu, ramai pengguna masih gemar bergantung kepada kenderaan sendiri kerana persepsi keselesaan dan fleksibiliti – menambahkan kesesakan di jalan raya.

Bagi menangani masalah lalu lintas di Malaysia, pendekatan pelbagai aspek diperlukan, menggabungkan peningkatan infrastruktur, penambahbaikan pengangkutan awam dan strategi pengurusan trafik pintar.

Pertama, melabur dalam pe-ningkatan infrastruktur dan memperluas rangkaian jalan raya bagi menampung bilangan kenderaan semakin meningkat. Ia termasuk membina lebuh raya baharu, melebarkan jalan sedia ada dan meningkatkan kesalinghubungan antara pusat bandar serta kawasan pinggir bandar.

Selain itu, memanfaatkan teknologi untuk pengurusan trafik pintar boleh meningkatkan aliran trafik dengan ketara dan mengurangkan kesesakan. Melaksanakan sistem pengangkutan pintar seperti kawalan isyarat trafik adaptif dan pemantauan trafik masa nyata, membolehkan pihak berkuasa mengoptimumkan aliran trafik, mengesan serta bertindak balas terhadap insiden dengan segera dan menyediakan pengguna maklumat tepat untuk merancang perjalanan lebih cekap.

Mempromosikan pilihan pengangkutan yang mampan seperti berbasikal dan berjalan kaki juga boleh membantu mengurangkan kesesakan serta kesan alam sekitar. Membina lorong berbasikal khusus, laluan mesra pejalan kaki dan mempromosikan inisiatif pengangkutan aktif menggalakkan orang ramai memilih mod perjalanan lebih sihat serta mesra alam untuk jarak dekat.

Kesimpulannya, menangani kesesakan lalu lintas di Malaysia memerlukan usaha diselaraskan daripada penggubal dasar, perancang bandar, pihak berkuasa pengangkutan dan orang ramai.

Dengan melabur dalam peningkatan infrastruktur, menambah baik pengangkutan awam, menerima penyelesaian pengurusan trafik pintar dan menggalakkan pilihan mobiliti mampan, Malaysia boleh membuka laluan kepada rangkaian pengangkutan yang lebih lancar serta cekap, meningkatkan kualiti hidup rakyat dan memacu pertumbuhan ekonomi mampan.

Apa pun perancangannya, rakyat perlu dididik dan diberi kefahaman terutama mengenai implikasi daripada tindakan mereka. Moga semua pihak dapat bekerjasama untuk mengurangkan kesesakan lalu lintas dalam negara kita. Semoga kualiti hidup di Malaysia terus meningkat.

#### 1.14. Ujian perubahan kelakuan pelajar

*Sinar Harian. 2024 March 14*

MINGGU ini kita menyaksikan pembukaan sekolah penggal pertama untuk sesi 2024. Kolum ini dua minggu lalu telah mula membicarakan mengenai isu dan cabaran pendidikan pada tahun ini.

Antara perkara penting yang disentuh adalah kebimbangan beberapa guru besar dan ibu bapa yang menggesa kerajaan meneliti semula keperluan mewujudkan peperiksaan Ujian Pencapaian Sekolah Rendah (UPSR) dan Pentaksiran Tingkatan Tiga (PT3).

Mereka beranggapan tanpa ujian atau penilaian standard, murid dan pelajar belajar tanpa hala tuju serta mencapai tahap yang tidak boleh dibuat perbandingan antara satu sekolah dengan sekolah lain, apatah lagi antara negeri di seluruh negara.

Mungkin elok juga kolum minggu ini mengupas lebih lanjut perkara tersebut terutama pendapat dua teman rapat penulis yang mempunyai pengalaman luas dalam bidang pendidikan.

Cikgu Man membuka kata dengan memberi kaveat bahawa pendapatnya adalah berdasarkan pengalaman kisah sebenar berlaku di sekolah dan bukanlah hasil kajian saintifik semata.

Cikgu Man mengingatkan penulis sekiranya kita ingin mewujudkan ujian atau peperiksaan semata-mata untuk meletakkan label tahap kecerdikan seseorang murid, maka itu adalah satu permulaan silap dalam sistem pendidikan negara.

Menurutnya, ia tidak ubah seperti melekatkan label hologram selepas sesebuah produk berjaya melalui ujian kualiti.

Sebaliknya, yang ingin kita uji adalah sejauh mana perubahan berlaku dalam kelakuan pelajar selepas mereka diberi pendidikan. Yang kita ingin tahu adakah kelakuan pelajar menjadi bertambah baik.

Sebab itu semua orang dalam dunia pendidikan sedia maklum objektif utama dalam pengajaran dan pembelajaran ialah change (improvements) of behaviour. Sebab itu juga dalam lesson plan kita, daripada awal lagi perlu dinyatakan behavioural objectives.

Sebagai contoh, jika negara menghadapi masalah sumber tenaga tidak cekap dalam melaksanakan tugas, penekanan dalam latihan adalah untuk menambah kecekapan tenaga buruh tersebut, bukan berapa A mereka perolehi dalam ujian.

Begitu jugalah dengan pendidikan moral. Hasil yang kita mahu adalah negara ini mempunyai rakyat lebih bermoral dan berintegriti dengan penurunan jumlah kes rasuah. Tiada maknanya semua pelajar mendapat 17A, namun jumlah kes rasuah masih terus meningkat.

Yang penting, penekanan dalam apa juga penilaian atau ujian dan seeloknya dibuat secara setara di seluruh negara bagi mencapai kefahaman yang kemudiannya mengubah kelakuan seseorang daripada buruk kepada lebih baik.

Seorang lagi teman penulis, Cikgu Roslan beranggapan selagi tidak ada lagi peperiksaan seragam seperti UPSR dan PT3, pelajar seakan tiada hala tuju dalam apa yang dicapai di peringkat Tahun Enam dan Tingkatan Tiga.

Jelas beliau, setakat ini pencapaian murid dalam Ujian Akhir Sesi Akademik mengikut Tahun 4/5/6 dan T1/2/3 tidak selari dengan pemberian Pentaksiran Bilik Darjah (PBD) sewaktu pembelajaran dan pemudahcaraan.

Sekiranya kita mengharapkan penilaian PBD sahaja, ada kemungkinan besar ia boleh dimanipulasi oleh guru yang kurang bertanggungjawab.

Pada waktu ini pun menurut beliau, terdapat segelintir pihak tidak bertanggungjawab telah menjual set soalan untuk kemasukan ke institusi pendidikan yang berprestij.

Saya tidak pasti sejauh mana benar tuduhan Cikgu Roslan, namun ia adalah untuk pihak berkuasa menyiasat dan mengambil tindakan sewajar dengan undang-undang negara.

Kita tidak boleh membenarkan perkara seperti itu berlaku yang boleh menjejaskan reputasi dunia pendidikan. Hanya sebab nila setitik, rosak susu sebelanga.

Daripada dua pandangan tersebut, dapat kita simpulkan sistem penilaian sedia ada hari ini membuka ruang untuk dimanipulasi oleh pihak tidak bertanggungjawab.

Justeru, penting untuk kembali kepada sistem peperiksaan seragam – kertas peperiksaan lebih terkawal. Namun, sistem peperiksaan seragam seluruh negara dengan kertas soalan terkawal pun tidak menjanjikan apa-apa jika peperiksaan tersebut tidak menguji perubahan kepada kelakuan pelajar.

Kita doakan semoga kolum minggu ini akan mendapat perhatian pihak berkenaan bagi mereka mencari penyelesaian tuntas untuk menangani isu ini.

### 1.15. Cabaran Pendidikan 2024

*Sinar Harian. 2024 Feb 29*

Baru-baru ini saya menerima undangan daripada Pengarah Pendidikan Jabatan Pendidikan Wilayah Persekutuan Kuala Lumpur sebagai pembentang dalam satu majlis wawancara mengenai Kepimpinan dalam Pendidikan: Cabaran 2024. Peserta terdiri daripada guru-guru besar sekolah seluruh Kuala Lumpur.

Terdapat lima perkara yang saya utarakan. Pertama, kepentingan latihan kepimpinan diterapkan daripada awal dalam kalangan bakal guru kerana mereka akan dipertanggungjawabkan memimpin anak murid dan sekolah.

Kedua, dalam mendidik seseorang, falsafah pendidikan saya idamkan bagi Malaysia adalah pendidikan itu dapat melahirkan pelajar yang akan menggunakan ilmu pengetahuan dipelajari untuk hidup berdikari dan membina serta mereka cipta peluang pekerjaan sendiri. Bukan bergantung harap kepada belas ihsan orang lain untuk memberi pekerjaan kepada mereka.

Pada hemat saya, ilmu yang dididik itu jadi gagal sekiranya pelajar tidak dapat memanfaatkan sepenuhnya untuk dia hidup berdikari dan mencari punca pendapatan sendiri.

Ketiga yang saya perincikan adalah cabaran menanti pendidik pada 2024 dan jenis kepimpinan VUCA (volatility, uncertainty, complexity dan ambiguity) dalam pendidikan yang diperlukan bagi menangani cabaran tersebut. Situasi semasa yang tidak menentu dengan persekitaran sangat kompleks dan mencabar memerlukan seorang pemimpin dalam bidang pendidikan yang versatil dan mempunyai ketahanan diri kental.

Perkara keempat, saya ungkap kembali cabaran sedia ada yang masih belum diatasi pemimpin tertinggi sektor pendidikan hari ini terutama dalam menentukan rakyat di kawasan desa mendapat pendidikan terbaik.

Saya difahamkan masih terdapat sekolah di pedalaman yang tiada kemudahan elektrik mahupun capaian internet. Begitu juga saya difahamkan hampir 65 peratus sekolah rendah di seluruh negara atau lebih kurang 5,772 sekolah berada di kawasan luar bandar.

Dengan data maklumat seperti di atas, mana mungkin kita dapat mencapai perkara kelima yang saya sebut pada hari tersebut iaitu pendemokrasian dalam pendidikan negara bagi mencapai kualiti dan matlamat dihayati oleh semua. Ia cabaran penting yang telah dirintih lama oleh rakyat dan saya pasti telah terkandung dalam pelbagai rancangan lima tahun Malaysia sebelum ini untuk diselesaikan.

Lebih menyedihkan, pada majlis tersebut saya dimaklumkan dalam peperiksaan subjek Bahasa Melayu Sijil Pelajaran Malaysia (SPM) untuk tahun lalu yang baru diduduki, terdapat beberapa pelajar tidak hadir. Tidak pasti berapa jumlahnya di seluruh negara.

Tanpa kelulusan dalam Bahasa Melayu, bermakna mereka telah sengaja menggagalkan diri. Kenapa perkara itu boleh berlaku hari ini? Adakah generasi hari ini terlalu terpengaruh dengan pengaruh media sosial sehingga semuanya ingin menjadi seperti mereka dan berasakan mereka tidak perlu ambil SPM? Di mana ibu bapa pelajar berkenaan?

Dalam sesi soal jawab selepas pembentangan saya pada hari tersebut, seorang guru besar melahirkan kebimbangannya, dengan apa yang beliau sifatkan sebagai pelajar tiada hala tuju kerana mereka tidak ada peperiksaan atau ujian perlu diduduki untuk dinilai di sekolah rendah dan menengah rendah.

Pada 1 Februari lalu, wartawan Sinar Harian telah menulis analisis bertajuk 'Acuh tak acuh belajar kerana tiada sasaran'. Benarlah seperti saranan wartawan itu yang melaporkan ramai pengguna media sosial menggesa kerajaan agar meneliti semula keperluan mewujudkan Ujian Pencapaian Sekolah Rendah dan dan Pentaksiran Tingkatan Tiga kerana ia amat membantu murid membuat persediaan lebih rapi.

Untuk lebih memahami isu tersebut, saya bertanya kepada beberapa rakan karib saya yang menjadi pendidik. Ada antara mereka di universiti, di sekolah kebangsaan dan sekolah swasta. Rata-rata mereka bersetuju ada keperluan untuk ujian yang standard, berwibawa dan seragam di seluruh negara diperkenalkan kembali.



Menurut Profesor Datuk Ir Dr Abdul Wahab Mohamad: “Kita tidak perlu mengikut model negara-negara maju lain. Kita perlukan model pendidikan kita sendiri. Kita harus melihat kemampuan guru kita dalam memberi pendidikan kepada pelajar. Bukan semuanya mampu menjadi pendidik yang dapat memberi tahap pendidikan kreatif dan inovatif.”

Tambah beliau: “Kita masih memerlukan peperiksaan, mungkin kalau tidak untuk semua, masih perlu untuk mata pelajaran penting yang dapat membangunkan kebolehan pelajar seperti Sains dan Matematik, yang lain-lainnya boleh dibangunkan kurikulum yang membantu pembelajaran secara experiential learning.”

Saya sangat bersetuju pandangan sahabat saya itu. Kolum akan datang saya akan kongsi pandangan-pandangan lain yang saya kira penting untuk diberi perhatian semua pihak. Semoga falsafah pendidikan yang saya dambakan untuk Malaysia akan dapat kita realisasikan bersama.

### 1.16. Apa makna Pilpres bagi Malaysia

*Sinar Harian. 2024 Feb 15*

NEGARA jiran kita Indonesia sedang bersiap sedia untuk menyambut Presiden mereka yang baharu dan proses pemilihan bermula 14 Februari 2024.

Di Malaysia, rakyat Indonesia yang bekerja di sini sudah melaksanakan tanggungjawab mereka pada hari Ahad yang baru lalu, 11 Februari 2024.

Mereka telah menjalankan tanggungjawab mereka dalam Pilihan Raya Presiden Indonesia (Pilpres) melalui proses pengundian awal.

Elok untuk kita juga di Malaysia mengenali secara ringkas tiga calon utama ini. Calon yang pertama bernama Anies Baswedan. Beliau berusia 56 tahun, adalah bekas Gabenor Jakarta (2017-2022) dan sebelum itu pernah menjadi Menteri Kebudayaan dan Pendidikan Indonesia (2014-2016).

Beliau mempunyai PhD dalam bidang Sains Politik dari Northern Illinois University di Amerika Syarikat, dan merupakan alumni Fakulti Ekonomi dan Perniagaan Universiti Gadjah Mada (UGM).

Calon kedua pula adalah Prabowo Subianto. Prabowo Subianto Djojohadikusumo, berumur 72 tahun, adalah pesara tentera darat Indonesia berpangkat leftenan jeneral. Setelah bersara beliau terlibat dalam perniagaan dan politik.

Beliau adalah penyandang Menteri Pertahanan (2019-sekarang). Disebabkan kedekatannya dengan kuasa sepanjang kerjaya ketenteraannya, dia memasuki politik pada tahun 2004 untuk mengejar impiannya menjadi presiden.

Ini adalah kali ketiga untuk beliau mencuba nasib bertanding sebagai calon Presiden. Dua kali sebelum ini beliau tewas kepada Presiden Jokowi.

Calon ketiga pula adalah Ganjar Pranowo. Ganjar Pranowo, berumur 55 tahun, adalah bekas Gabenor Jawa Tengah (2013-2023), dan sebelum itu, ahli Parlimen (2004-2013) untuk Parti Demokrasi Indonesia Perjuangan (PDI-P).

Beliau mempunyai ijazah pascasiswazah dalam bidang Sains Politik dari Universiti Indonesia dan merupakan alumni Fakulti Undang-undang Universiti Gadjah Mada (UGM).

Daripada ketiga-tiga tokoh ini sudah tentunya yang paling popular dalam kalangan pengundi adalah Prabowo.

Ini kerana selain daripada beliau menjadi penyandang Menteri Pertahanan Indonesia pada waktu ini, beliau juga sudah dikenali dalam dua pemilihan Presiden sebelum ini dan latar belakang ketenteraannya.

Walaupun kalah dua kali ketika menentang Presiden Jokowi, tetapi kali ini Prabowo bertanding dengan memilih anak sulung Jokowi, Gibran Rakabuming Raka sebagai timbalan beliau.

Tidak pasti sama ada ini satu strategi untuk meraih sokongan Presiden Jokowi terhadap beliau, tetapi apa yang pasti reaksi Presiden Jokowi yang sepatutnya tidak memihak dalam pemilihan ini telah menjemput pelbagai reaksi negatif daripada laporan dalam dan luar negara.

Sambil pelbagai spekulasi yang dapat kita baca mengenai siapa antara tiga calon ini yang mempunyai sokongan ramai rakyat Indonesia, kita juga dapat melihat pola sokongan yang hampir sama dengan pemilihan tahun 2004.

Walaupun 2004 lebih ramai calon yang bertanding tetapi kita pasti mengingati bagaimana kepetahan dan kebijaksanaan pidato Pak Amien Rais tidak mampu untuk menyekat kemaraan seorang mantan jeneral pada ketika itu Pak Susilo Bambang Yudhoyono untuk dipilih sebagai Presiden.

Hari ini saya tidak pasti sama ada pidato hebat dan pandangan jauh Anies Baswedan akan mampu mengubah selera rakyat terbanyak Indonesia yang mungkin lebih terpesona dengan latar belakang ketenteraan Prabowo sebagai satu aset penting kepada bakal pemimpin mereka.

Apa yang pasti Prabowo mempunyai pangkalan sokongan yang kukuh. Walau bagaimanapun, pengkritik berpendapat bahawa imej autoritariannya mungkin menghalang rayuannya kepada pengundi yang lebih luas.

Kejayaan Prabowo sudah pasti bergantung kepada sokongan Presiden Jokowi dan pada waktu ini memang jelas Presiden Jokowi menyebelahi beliau.

Apa makna semua ini kepada rakyat kita di Malaysia? Rakyat Malaysia hari ini sedang melihat bagaimana negara-negara jiran yang satu ketika dahulu cuba keluar daripada kebobrokan pemimpin yang lalu yang tebal dengan semangat kronisme, telah secara perlahan kembali ke era lama.

Majalah Economist pada 8 Februari 2024 dalam lead editorial mereka menulis "...semangat kronisme yang terserlah dalam kempennya amat merugikan Indonesia.

Jokowi yang dikenali dalam tahun 2014 sebagai seorang pemimpin yang membawa udara yang segar.... tetapi di penghujung kepimpinan walaupun beliau telah mengukuhkan ekonomi negara, beliau gagal untuk mengukuhkan demokrasi Indonesia....he leaves behind a rotten smell." Filipina juga hari ini sudah kembali dengan keluarga Marcos.

Bagaimana dengan kita di sini?

### 1.17. Polis dan Kepercayaan masyarakat

*Sinar Harian. 2024 Feb 01*

SEMASA saya membesar di kampung dahulu, kampung kami bersebelahan dengan sebuah balai polis.

Terdapat ramai anggota polis yang sudah berkeluarga tinggal menyewa di kampung kami.

Mereka menjadi sebahagian daripada anggota masyarakat setempat.

Ada dalam kalangan mereka yang membantu di masjid sebagai imam, bilal dan ada juga yang menjadi tukang masak di bulan Ramadan.

Anak-anak mereka bersekolah dan bermain bersama anak-anak setempat.

Hubungan anggota polis dengan masyarakat dalam ingatan saya dahulu sangat baik.

Malah tahap kepercayaan masyarakat kepada polis untuk menyelesaikan masalah mereka juga sangat tinggi.

Sehinggakan sekiranya ada kanak-kanak nakal, ibu bapa akan merujuk untuk kanak-kanak itu dihantar kepada sarjan misai garang dan itu sudah cukup untuk membuat kanak-kanak tersebut berkelakuan baik.

Hari ini saya tidak pasti sama ada persepsi masyarakat masih sama seperti dahulu. Dalam beberapa minggu kebelakangan ini terlalu banyak laporan salah laku polis yang dilaporkan di media.

Daripada berita tular pasangan Inggeris yang bercuti di Malaysia dilepaskan bagi kesalahan trafik dengan bayaran RM100, hinggalah kes anggota yang merogol dan pelbagai salah laku integriti lain.

Menurut kenyataan Ketua Polis Negara yang disiarkan pada 23 November 2023, sejak Januari sehingga Oktober tahun lalu, Jabatan Integriti dan Pematuhan Standards (JIPS) Polis Diraja Malaysia (PDRM) menerima 5,413 aduan.

Daripada jumlah tersebut 4,497 subjek membabitkan pegawai polis.

Semasa saya menjadi Timbalan Pengerusi Suruhanjaya Integriti Agensi Penguatkuasaan (SIAP) dahulu, hampir 90 peratus aduan setiap bulan berkaitan anggota PDRM.

Tidak hairan dengan jumlah aduan yang tinggi, kerana kekuatan anggota polis keseluruhan pada ketika ini adalah seramai kira-kira 130,000 anggota berbanding anggota agensi penguatkuasaan yang lain.

Hari ini negara mempunyai Suruhanjaya Bebas Tatakelakuan Polis yang khas untuk memantau salah guna kuasa anggota polis.

Sambil kita membincangkan mengenai perkara melibatkan salah guna kuasa, kita juga perlu sedar bahawa kuasa yang terletak di tangan anggota polis juga adalah penting untuk mengekalkan undang-undang dan ketenteraman dalam masyarakat.

Di Malaysia, peranan polis adalah penting dalam memastikan keselamatan dalam negeri dan rakyatnya.

Bagaimanapun, seperti mana-mana pihak berkuasa yang lain, terdapat potensi penyalahgunaan kuasa yang menimbulkan kebimbangan tentang keperluan untuk akauntabiliti dan pengawasan.

PDRM memainkan peranan yang penting dalam menegakkan kedaulatan undang-undang, dengan kuasa diberikan di bawah pelbagai undang-undang seperti Akta Polis 1967 dan Kanun Tatacara Jenayah.

Walaupun kuasa ini penting untuk mengekalkan ketenteraman, contoh salah laku polis dan salah guna kuasa yang pernah berlaku sebelum ini telah mencetuskan bantahan awam dan menimbulkan persoalan tentang keperluan untuk semak dan imbang.

Penyalahgunaan kuasa boleh dinyatakan dalam pelbagai bentuk, termasuk penggunaan kekerasan yang berlebihan, penahanan sewenang-wenangnya dan gangguan.

Ketidakseimbangan kuasa antara penguat kuasa undang-undang dan rakyat memerlukan pertimbangan yang teliti untuk mengelakkan terhakis kepercayaan dan keyakinan orang ramai terhadap pasukan polis.

Apa yang boleh kita lakukan untuk memperbaiki persepsi ini?

Penubuhan Suruhanjaya Tatakelakuan Polis adalah satu inisiatif baik yang diharapkan akan dapat mengubah persepsi buruk masyarakat terhadap PDRM, apatah lagi kerana kita tahu ramai dalam kalangan anggota yang tinggi disiplin dan integritinya.

Sekiranya menggunakan statistik tahun lalu yang dilaporkan oleh Ketua Polis Negara, 4,497 kes hanyalah 0.035 peratus daripada jumlah keseluruhan anggota.

Namun ini tidak harus dijadikan sebab untuk tidak memandang serius kepada perkara ini.

Terdapat beberapa perkara lain yang boleh dilakukan seperti memperkenalkan kamera wajib pakai badan untuk pegawai polis semasa berinteraksi dengan orang ramai.

Ini boleh berfungsi sebagai rekod objektif kepada apa yang berlaku.

Teknologi ini bukan sahaja mempertanggungjawabkan pegawai tetapi juga melindungi mereka daripada tuduhan palsu.

Pengauditan tetap terhadap rakaman boleh membantu mengenal pasti dan menangani sebarang corak salah laku.

Kita juga boleh memperkukuh inisiatif kepolisan komuniti dengan memupuk hubungan positif antara penguat kuasa undang-undang dan orang ramai.

Ia menggalakkan pegawai untuk melibatkan diri dengan komuniti, memahami kebimbangan mereka dan membina kepercayaan.

Input komuniti dalam membentuk strategi kepolisan boleh membawa kepada penguatkuasaan undang-undang yang lebih bertanggungjawab dan responsif.

Salah seorang pelajar doktor falsafah (PhD) saya ada membuat kajian mendalam mengenai tahap keberkesanan latihan dalam PDRM yang menjurus kepada pembudayaan integriti.

Cadangan dalam kajian ini boleh dirujuk untuk penambahbaikan dalam PDRM.

Melabur dalam program latihan komprehensif untuk pegawai polis adalah penting. Ini termasuk pendidikan tentang hak asasi manusia, teknik de-eskalasi, dan sensitiviti budaya.

Malaysia dengan kepelbagaian etnik memerlukan anggota yang faham budaya semua kaum dalam negara.

Latihan berterusan boleh memberi kebijaksanaan kepada pegawai untuk membuat keputusan termaklum dan adil dalam situasi tekanan tinggi, mengurangkan kemungkinan tingkah laku yang kasar.

Mengimbangi kuasa dan akauntabiliti polis adalah tugas rumit yang memerlukan pendekatan pelbagai aspek.

Kerajaan Malaysia mesti secara aktif menangani kebimbangan mengenai penderaan polis, memupuk persekitaran di mana rakyat berasa dilindungi dan bukannya terancam oleh penguatkuasaan undang-undang.

Dengan melaksanakan pengawasan bebas, menerima teknologi, memupuk hubungan masyarakat, melabur dalam latihan dan melindungi pemberi maklumat, Malaysia boleh bergerak ke arah pasukan polis yang lebih bertanggungjawab serta melayani kepentingan orang ramai dan rakyat yang dijanjikan akan dilindungi.

### 1.18. Laluan Malaysia menuju masa depan

*Sinar Harian. 2024 Jan 18*

DALAM landskap dunia global yang sering berubah dengan pantas, mengemudi masa depan sesebuah negara memerlukan pandangan jauh, perancangan strategik, dan pemahaman yang mendalam tentang ketidakpastian yang menanti kita.

Pada waktu seperti ini ilmu untuk membuat foresight atau scenario planning menjadi sangat penting.

Malaysia satu ketika dahulu pernah mempunyai rancangan masa depan yang mengambil kira lebih 30 tahun ke hadapan iaitu melalui Wawasan 2020.

Hari ini 2020 sudah hampir empat tahun berlalu. Pencapaian kita pada 2020 berbanding apa yang kita rancang walaupun dikaji akan hanya menjadi satu lagi latihan akademik. Mungkin lebih baik untuk negara sediakan satu lagi rancangan jangka panjang yang lebih realistik.

Pada hemat saya mungkin masanya sudah tiba untuk kita menyediakan Malaysia untuk 50 tahun akan datang.

Dalam kita melihat ke arah 50 tahun akan datang, adalah penting untuk mengiktiraf sifat dinamik dunia yang saling berkaitan dan bersedia menghadapi cabaran dan peluang yang akan membentuk nasib negara kita.

Salah satu ketidaktentuan utama yang dihadapi Malaysia ialah landskap geopolitik yang berkembang. Apabila dinamik kuasa berubah dan pakatan baharu terbentuk, Malaysia mesti mengemudi dengan cekap di peringkat antarabangsa.

Memperkuh hubungan diplomatik, memupuk perkongsian, dan menggalakkan kerjasama pelbagai hala akan menjadi penting dalam menjaga kepentingan negara dan memastikan daya tahan ekonomi kita.

Kepelbagaian ekonomi dunia masa kini harus menjadi sebagai satu lagi aspek penting dalam memikirkan tentang masa depan Malaysia.

Dengan peningkatan automasi dan kecerdasan buatan, cara dan budaya bekerja akan berkembang dengan pesat. Penyediaan tenaga kerja untuk industri yang baharu muncul perlu difikirkan.

Pelaburan dalam pendidikan dan teknologi, ditambah dengan dasar strategik boleh meletakkan Malaysia sebagai pemain global penting dalam Revolusi Perindustrian Keempat.

Kelestarian alam sekitar merupakan kebimbangan mendesak yang memerlukan perhatian segera. Perubahan iklim menimbulkan ancaman kepada ekosistem, pertanian, dan kesejahteraan keseluruhan.

Peralihan demografi ke arah populasi yang semakin tua adalah ketidakpastian demografi yang tidak boleh diabaikan oleh Malaysia.

Perancangan untuk infrastruktur yang akan membolehkan orang tua-tua bergerak dengan selesa, penjagaan kesihatan, program kebajikan sosial dan dasar yang menyokong penuaan aktif adalah penting.

Memanfaatkan potensi teknologi adalah penting dalam persediaan menghadapi ketidaktentuan yang akan datang.

Menerima keperluan transformasi digital dalam governans, penjagaan kesihatan dan pendidikan bukan sahaja akan meningkatkan kecekapan tetapi juga meletakkan Malaysia sebagai peneraju dalam ekonomi digital global.

Langkah keselamatan siber mesti diperkuh untuk melindungi infrastruktur kritikal dan melindungi daripada potensi ancaman luar.

Menangani ketidaksamaan pendapatan adalah langkah penting ke arah membina masyarakat yang berdaya tahan dan inklusif.

Melaksanakan dasar yang merapatkan jurang kekayaan, menggalakkan mobiliti sosial, dan menyediakan peluang yang sama untuk semua rakyat akan menyumbang kepada kestabilan dan kemakmuran jangka panjang.

Tambahan pula, Malaysia mesti proaktif dalam mengurus potensi ketegangan geopolitik, memupuk daya tahan ekonomi, dan mengutamakan kelestarian alam sekitar.

Kesimpulannya, masa depan Malaysia dalam 50 tahun akan datang sememangnya tidak menentu, tetapi langkah proaktif oleh pemimpin dan rakyat Malaysia pada hari ini boleh mengurangkan risiko dan membuka jalan kepada negara yang makmur dan berdaya tahan.

Ini adalah masanya untuk meletakkan asas bagi masa depan yang mencerminkan aspirasi dan daya tahan rakyat Malaysia 50 atau 100 tahun lagi. Semoga Malaysia terus makmur.



## 1.19. Harapan Tahun Baharu

*Sinar Harian. 2024 Jan 04*

2024 dilihat sebagai tahun yang mempunyai pelbagai kemungkinan. Kita boleh melangkah maju ke hadapan dan menjadikan negara ini bukan sahaja maju dan membangun dalam konteks ekonomi dunia tetapi juga kaya budi pekerti timur serta tebal dengan budaya mulia yang mengutamakan integriti.

Pada masa sama, kita juga boleh memilih meruntuhkan ekonomi negara dengan bersikap negatif dan terus menjadi pengkritik tegar kepada semua perkara di sekeliling kita tanpa menyumbang kepada mencari solusi yang dapat membangunkan negara.

Tepuk dada tanya selera. Kita semua ada peranan membentuk Malaysia tahun ini. Sumbangan kita mungkin tidak sama tetapi matlamat akhir untuk melihat Malaysia lebih baik harus menjadi cita-cita semua rakyat Malaysia.

Inilah matlamat penting yang harus tertanam dalam sanubari rakyat Malaysia. Kita tidak boleh serahkan segalanya kepada kerajaan.

Benar, kita ada beberapa masalah dalam negara, namun adakah kita memilih untuk terus menjadi sebahagian masalah tersebut atau kita menjadi sebahagian penyelesaiannya?

Kolum ini untuk minggu pertama 2024 akan terus mengetengahkan harapan dan rintihan rakyat, namun akan terus juga menyumbang idea bagaimana kita boleh memperbaiki negara ini.

Kita harus tetap berbangga dalam apa juga situasi dan masalah yang kita hadapi, namun Malaysia jauh lebih baik dalam beberapa aspek tertentu. Aspek positif yang menyumbang kepada Malaysia yang dihormati di mata dunia harus kita terus semai dan bina.

Baru-baru ini Universiti Malaya (UM) menerima 15 penuntut tahun akhir dari Universiti Sharjah, Emiriah Arab Bersatu (UAE). Mereka dihantar mengikuti kursus anjuran UM LEAD yang memberi fokus kepada kepimpinan berprinsip dan bermatlamat.

Mereka adalah sebahagian daripada program kepimpinan muda Emirati – mempunyai matlamat akhir melatih pemimpin yang akan dapat memaju dan memakmurkan UAE.

Bayangkan, negara seperti UAE yang mempunyai dua kota hebat seperti Dubai dan Abu Dhabi tetapi memilih Kuala Lumpur sebagai destinasi melatih pemimpin masa depan mereka.

Jika dibandingkan UAE dengan kita mengguna lensa indeks antarabangsa, mereka jauh lebih ke depan dalam UNDP Human Development Index dan Transparency International Corruption Perception Index (CPI). Antara negara-negara Arab, UAE berada di tangga paling atas CPI.

Namun, ada kelebihan di Malaysia pada mata Naib Canselor Universiti Sharjah yang datang melawat negara ini beberapa bulan lalu untuk dipilih sebagai tempat latihan bagi pemimpin masa depan mereka.

Apa pun pandangan beliau, kita harus berbangga. Fakta ini penting untuk kita raikan dalam menyambut tahun 2024 bahawa tidak semua dalam Malaysia ini yang buruk. Bukan semuanya tidak berfungsi atau sudah rosak.

Kalau benar seperti telahan sesetengah pihak, maka sudah tentu kita akan menjadi salah sebuah negara gagal dalam dunia. Tidak mungkin ada pelabur yang akan datang melabur di sebuah negara yang gagal.

Masalah kita seperti yang pernah saya tulis dalam kolum ini tertumpu kepada tiga perkara atau 3 'I'. 'I' pertama ialah masalah integriti. 'I' kedua ialah masalah integrasi kaum. 'I' yang ketiga ialah intrig iaitu usaha berkomplot, bersekongkol dan bersubahat untuk saling menjatuhkan antara pemimpin. Lebih tepat lagi dalam pergelutan kuasa.

Sekiranya tiga 'I' dapat kita atasi dengan baik, saya pasti Malaysia akan menjadi negara lebih dihormati di mata dunia. Integriti dan integrasi adalah dua perkara yang sering saya tulis serta penting untuk difahami implikasinya kepada negara.

Implikasi kepada masalah pergelutan kuasa tidak perlu dijelaskan lagi. Ia sangat meninggalkan kesan yang boleh melumpuhkan keseluruhan negara.

Sama-samalah kita berdoa agar 2024 akan menjadi pengubat kepada penyakit 3 'I' di Malaysia dan semoga pengajaran dari tahun-tahun lalu menjadi teladan untuk kita elak persengketaan. Semoga Malaysia terus aman dan makmur. Selamat tahun baharu!